

Vizyon

Oli senserite Michel?

Sa konser organize apele 'Miting Konsiltativ' in montre nou ankor enn fwa ki Mr. James Alix Michel i en boug ki koz zoli parol, me ki vreman napa gran senserite dan son aksyon. I en boug ki pe rod tou piblisite lo televizyon avek bi anbet lepep Seselwa zis pour li reste o-pouvwar. Nou espere ki Seselwa in ouver zot lizye byen gran e ki ozordi zot konpran byen sa bann zes ki pe arive otour zot.

Son lotorite

Dan miting Cascade, Mr. Michel ti debout e dir byen for ki in **donn lord** STC pou fer desann bann komodite. STC i en lakonpanyen gouvrenman parey Air Seychelles. De zour pli tar, serten komodite ti desann par 25c. Me selman letan sa madanm Praslin ti koz lo pri avyon ki ser, Mr. Michel ti reponn ki li osi i konnen i ser, me ki malerezman i pa kapab fer nanryen. Ki mannyer eski sa i apele? Lekel ki Mr. Michel pe anbete? Akoz i de fas avek sa pep? Oli son lotorite?

Vizit Zapon

Mr. Michel ti al fer vizit ofisyel Zapon. Avan ki i ti ale, 2 bato Seselwa ek 10 Seselwa ti'n ganny pran otaz. I ti okouran tou sala, me i ti deside ale kantmenm. Me pour li zve politik, i ti fer SBC telefonn li e pas sa lo televizyon. I ti dir ki in donn lord larme pou pran tou aksyon nesaser e servi tou resours kan i ti konnen ki sel bato larme Andromans pa tro an-form. Apre i ti dir ki i pe retournen deswitu pou li lo kote son pep. Sa ti zis en lot bat latet akoz son vizit ofisyel Zapon ti'n fini. Sanmenm sa aksyon en prezidan senser?

Jj Spirit Foundation

Mr. Michel i oule fer lepep Seselwa kwar, parey i ti seye Anse Etoile, ki i napa nanryen

pou fer avek Jj Spirit Foundation. Dapre li i zis patron sa lorganizasyon. Eski pa i drol ki en lorganizasyon avek son lanblenm politik i ganny servi e ki li i napa nanryen pou fer avek? Me selman se byen Mr. Michel ki telefonn dimoun personnelman pour zot zwenn sa lorganizasyon e menm partisip dan son aktivite! Anplis ki sa, se Mr. Jean-Paul Adam, son Sekreter Deta ki dirizan prensipal sa lorganizasyon. Lekel ki sa imsye pe esye anbete silvouple? Lepep Seselwa? Eski sanmenm sa ki ou apel en zomm senser ki atas li avek laverite? Ouver nou lizye lepep!

Pa kapab fer li konfyans!

Tou Seselwa in fini realize ki dan sa moman kot nou pe viv, nou nepli kapab fer konfyans Mr. Michel. Avan eleksyon i ti promet lesyel ek later, me ozordi letan lepep i regarde, nou trouv plis souffrans e lavi i dir. Napa kalite zoli parol ki i pa'n dir nou, me larealite i totalman diferan. Lepep Seselwa i war en boug zis lo televizyon avek Antoine Onezime, son zwer, zis pe anbet lepep Seselwa. Akoz aprezan letan i fer konferans de pres i envit zis SBC? Pa i kler se akoz Mr. Davidson Barra ti demann li keston anbarasan? **Michel pa senser!**

Zwenn nou le 1 May

Nou envit tou dimoun pou zwenn SNP dan en gran selebrasyon lazournen travayer le **1 MAY, ARPENT VERT**, aparti **7ER DISWAR** pour en sware inoubliable. Vin selebre nou travayer e an menm tan vin asiste tiraz nou lotri. Bann dirizan parti pou osi pran laparol pou koz lo sitiasyon nou pei ozordi. Vini zot tou, e ansann annou pa oubliy ki SNP:

SNP Lottery

WIN WITH THE SNP!

PRIZES

- 1st : Family holiday : Four return tickets to Mauritius + 7 days accommodation on BB
- 2nd : Two return tickets to Singapore
- 3rd : Two nights HB at La Reserve Hotel, Praslin
- 4th : Two nights BB at L'Archipel Hotel, Praslin
- 5th : SR5000 cash
- 6th : SR5000 cash
- 7th : One washing machine
- 8th : One refrigerator
- 9th : One TV set
- 10th : One DVD player
- 11th : One Guitar
- 12th-20th : Consolation prizes

R10/-

'Pa Pou Zanmen Les Tonbe!'

Bon nouvel i reserve pou Prezidan

In pran en labitid aprezan ki ler i annan move nouvel, zanmen ou vwar li. Me sak fwa i annan bon nouvel, se li ki taye pou anonse – senpleman pour li pas koman en ero ouswa koman en bon doug.

Parfwa kot i fer sa bann lanons pa ni menm dan bann foronm apopriye. Par ekzanp dan rankont konsiltativ. I kler ki pour msye Michel sa bann miting i en kanpany politik.

Cascade i ti anonse ki elektrisite pou redwir par 25 sou lo sak inite pour konsomasyon domestik. Me aköz dan menm miting Konsiltativ Praslin, i pa ti dir nou ki pri karbiran pe al mont par Rs1.50 sak lit?

Bann dimoun aze tya kontan antann en prezidan ki dir i annan en leker pour tou Seselwa eksplike aköz 1500 parmi zot pou nepli ganny en 'carer' pou asiste zot dan lazourmen. Bann travayer ki'n ganny forse kit travay tya kontan i dir zot ki mannyer zot o sant devlopman letan zot vwar etranze pe kontinyen rantré isi pou travay. Bann paran tousel ki pe lager pou fer de bout zwenn i anv i dir zot ki mannyer i santi zot soufrans letan pa li ki bezwen tourn anron kot biro lazans byennet sosyal.

Lepep pa bezwen en prezidan ki fye lo son bann o zofisye dan gouvènmàn pou annons move nouvel. Nou anv i konnen ki i osi fran e brav pou vin devan letan i annan en move keksoz pou anonse.

Me pli enportan ankor, lepep in fatigue war en Prezidan ki aparet lo televizyon plis ki travayer SBC zot menm. Eski Mr. Michel pankor war ki i pe abiz lo son privelez. Seselwa i dir plito les zot get telenovela boner e si i anv i SBC pas li pli tar pour ki sa ki oule get li i ava lib! Ziska kan sa pep pou soufer?

Ankor en ta pou repeye!

Gouvènmàn pe felisit son lekor aköz in reisi ganny en rediksyon \$70 milyon lo lakantite larzan ki i dwatet repey Paris Club. Me eski sa i merit leka? Sa sonm pros \$800 milyon ki nou ti dwa an total i montre klerman ki nou annan en gouvènmàn iresponsab. Si nou reisi negosye menm term avek bann labank komersyal e lezot endividi ki nou dwa, i pou reste Sesel ankor anviron \$440 milyon pour nou rann.

Me sa ki enportan note se ki avan devaliasyon roudri an Oktob 2008, nou ti drwa Rs4.5 mil milyon. Avek devaliasyon sa sif in aprezan ogmante pou ariv Rs13 mil milyon. Savedir menm si apre negosiasyon nou pou

drwa \$440 milyon, an roudri, nou pou drwa plis ki avan. Sa i en total Rs7 mil milyon!

Parey labitid SPPF i mazin tou keksoz an term eleksyon. Alor zot in negosye en peryod gras 5an, pou asire ki napa nanryen dan zot larout pandan eleksyon prezidansyel 2011 e Lasanble Nasyonal 2012. E finalman letan nou rekomans peye, i pou pran nou en total 18an pou fini. I kler i annan en ta pou repeye.

Dan 5an, plizyer zofisye gouvènmàn ki'n responsab pou pran bokou sa bann milyon pou nepli la. Sa ki'n profite e byen pase pa pou la. Pou napa personn pou rann kont. Antretan se zenerasyon lavenir ki pou bezwen pey pour bann move desizyon. Sa SPPF sa!

Fodre refer Lafors Defans

Menas anmennen par bann pirat Somalyen san dout in fer lev bokou kestyon lo rol nou lafors defans. Pandan 32an lekzistans, sa departman in resevwar an mwayen Rs90 milyon par an koman en bidze. Fason ki i depans sa larzan i ankor en sekre, ki menm bann manm Lasanble Nasyonal napa permisyon demann kestyon lo la.

Ozordi, apre ki 10 Seselwa in ganny atrape avek pirat dan nou lanmer, lepep i oule konn vre kapasite nou lafors e si zot annan fasilite nesese pou defann nou teritwar e protez nou sitwayen. I pa en sekre ki dan sa deryen 30an, larme in ganny servi sirtou pou protez bann Prezidan avek zot fanmiy, pou enterfer dan travay lapolis, sirtou dan bann levennman politik e pou fourni labourer kot konstruksyon prive bann o zofisye. Depi latak mersener an

1981, nou larme pa'n zanmen an aksyon. Sa in kit lespas pour bokou defi.

Ozordi SNP pe dir ki lemoman n'arive pou seryezman revwar misyon nou lafors e pou asire ki zot annan resours apopriye ler zot bezwen. Nou'n tou-l-tan demande ki gard lakot i ganny plis resours pour zot patrol nou zone ekonomik eksklisiv pli byen. Nou osi kwar ki sa lafors i dwatet annan bann pos lo bann zil elwanyen, pou rann son patrol pli efektiv. Mahé i pa nou sel teritwar, alor i enportan ki nou lafors i enpe partou.

Malgre bann politik bon marse par Mr. Michel, Seselwa i konnen ki SNP i krwar dan en reorganizasyon sa lafors dan en fason servi byen bann resours. SNP pa kont larme, me nou kwar ki i pa la zis pou protez serten sef, me lepep Seselwa antye.

PAS PARTOU

Koz ek ou frer!

Fodre ki gran sef i koz avek son frer. I pas tro bokou son letan lo telefonn pe dir tou kalite parol ensinifyan avek bann madanm. Kefwa son lakonpanyen osi i devret pran aksyon aköz i pe abize. Keksoz pe al tro lwen!

Respe pour Speaker

Ki sa bann move mannyer dan Lasanble par Madanm Potter? Olye lev son lanmen parey tou manm, i fer 'pss pss' avek Speaker konmsi i pe kroy son mimi dan lakour. Montre respe pour sa sez silvouple madanm! Not nice!

Landbank zis pour sef?

Ki pe arive avek later landbank? Apre ki SNP in dir ki fodre pa ki etranze i aste later landbank, e ki SPPF in dakor avek, la aprezan nou war bokou zanfàn bann sef e bann sef menm ki pe ganny sa bann later. I annan enn ki'n ganny later dokter e ki aprezan fek ganny later landbank. Ki pou arive ek malere dan sa pei? SPPF pe pran tou gro bout e donn lepep pikan? Ki wa fer, tenir....

Lo zil avek larme... ankor

Pandan ki Seselwa pe trimouse Gran Golan i lo Remire avek son fanmiy antoure avek larme... Ale Sesel!

Ki Privelez Fondasyon Jj Spirit?

Letan msye René ti fer koudeta an 1977, i ti koz manti avek lepep an dizan i pa konn nanryen ladan, me ki en group dimoun in demann li pou vin Prezidan. La aprezan nou konnen kote msye Michel in aprann leson koz manti.

Apre ki in form fondasyon Jj Spirit – pirman pou aste vot bann zenn, i deklare ki i napa nanryen pou fer avek sa, me ki zot in demann li pou vin patron. Eski koman prezidan e osi koman patron sa fondasyon i kapab dir nou aköz ki HFC pa kapab donn loan ankor sa lannen, me son fondasyon i annan pou donn an abondans?

Si i kwar dan latransparans parey i oule fer nou kwar, dir lepep kote son fondasyon i ganny son finansman e ki kantite larzan zot annan pou donner. Sanmenm sa 'cheap politics' imsyé Michel. Aret esey bat latet bann zenn. Nou war ou!